

Birginidat na Benta

E-bay ta konosí komo un sitio na internèt ku kualke persona por bende kualke kos ku nan ke deshasí di dje i kumpra di otro hende loke nan ta ofresé. Bo por fiha e preis ku bo ta despuesto pa paga òf kumpra loke ta ofresé. E persona ku ta bende su produkto lo aseptá e preis mas haltu ku e por haña mientras e kumpradó naturalmente ta deseá di paga e suma mas barata pusíbel.

Siman pasá, E-bay a prohibí un yùfrou di 18 aña bibando na Inglatera di bende loke e tabata ofresé: su birginidat. E mucha muhé a splika ku e ke bai universidat, i ku esei ta kostoso. Pensando kon e por kubri su gastunan, el a kai riba e idea ku su birginidat ta algu di balor, ku e no tin mester di dje, i ku otro hende lo ta despuesto pa paga p'è. Na momentu ku E-bay a prohibí e yùfrou di buska benta pa su birginidat, ya kaba un hòmber a ofres'é \$18.000 pa e “privilegio” di tene relashon seksual. E yùfrou a deklará ku e lo sigui ku su búskeda pa hende ku lo ta despuesto pa paga mas pa su birginidat dor di establese su mes “web site”.

Maske e yùfrou ingles su pensamentu ta malamente kiboká, e tin sierto rason: **birginidat ta algu di balor!**

Kada persona ta nase komo birgen—tantu hende muhé komo hende hòmber. (Nos tin kustumber di usa e palabra mas tantu pa damanan, ma e ta un echu pa kabayeronan tambe!) Dios a krea kada persona komo birgen pa nos por tin un regalo presioso pa duna nos esposo òf esposa nochi di kasamentu. E persona ku ta mantené su mes komo birgen te matrimonio ta komuniká ku su kasá, “Mi a stimábo promé ku mi a konosébo. Ma a ekspresá mi stimashon wardando mi kurason i kurpa pa bo so. Mi no a duna un pida di mi kurason na Sharine, un otro pida na Joyce, un otro pida na Maria, anto regalá e pida chikitu ku a sobra na mi brùit awe nochi.”

Ma **tantu hende tin e regalo aki pa nada!** Meskos ku e mucha muhé ingles, nan ta pensa ku birginidat ta algu di balor ku ta innesesario. Asta tin un mentalidat ku e ta algu malu...algu ku mester deshasí di dje mas pronto ku ta pusíbel. I tin tantu kaiman na boka di riu ku gustosamente lo ta despuesto pa fasilidat esei...manera un diamante tirá den bari di sushi. Apesar di tantu palabra bunita ku ta sali di boka di e “kaimannan”, abo ta bira solamente un otro trofeo—talbes trofeo number 8—den su lista di yùfrounan ku el a konkistá!

Dios ta konsiderá un akto immoral ku un birgen algu serio. Den Tèstament Bieu, e mener mester a kasa ku e yufrou òf paga tata di e mucha muhé. *“I si un hòmber sedusí un birgen ku no ta komprometí, i e drumi kuné, e mester paga plaka-di-brùit pa e bira su esposa. Si su tata nenga apsolutamente di dun'é na e hòmber, e hòmber mester paga plaka konforme e plaka-di-brùit pa (e) birgen”* (Eksodo 22:16-17)

Relashon seksual ta algu pa warda pa abo ku bo kasa SO! Palabra di Dios ta bisa, *“Laga kada hòmber tin su mes esposa, i laga kada muhé tin su mes esposo”* (1 Korintionan 7:2).

Si hende ta hasi cherchi di bo òf ta pone preshon riba bo pasobra bo ta mantené bo mes komo birgen, **para duru!** No entregá na nan deseonan egoísta! No deshasí di bo birginidat. I sigur no pon'é na benta!